


RUEDI KREBS, KENNET DIR SCHO DS NPM?

kennet dir scho ds NPM
NPM so seit me däm
besser wärdi alls am änd
mit new public mänätschmänt
und was gä die für ne rat
wie-n-e firma syg dr staat
und dr bürger syg e chund
und was überchunnt e chund
es produkt
es produkt
dasch üses änd
dasch üses änd
new public mähhh
new public mähhh
new public mähhh-nähhh-tschmänt
input output effiziänz
qualität u kompetänz
gäng no schnäller ohni änd
optimiere permanänt
und kontrolle rund um d'uhr
fragebopediktatur
und am schluss wird unschiniert
no d'kontrolle kontrolliert
und ir schuel dr lehrer seit
loset wis bi üs jetz geit
nützlechs nume wird studiert
das wo d'wirtschaft üs diktiert
grad wi im ne-n-outomat
alles isch für öich parat
und dr schüeler isch e chund
und isch wenn är usechunnt
und we die vor polizei
einisch eine gfange hei
und dä hinger gitter chunnt
isch dä gängschter prompt e chund
chunde sötte zfride sy
gschäft sy süsch de gly verby

und was isch e guete chund
wenn er gly scho wieder chunnt
wäm me früecher ghulfe het
däm wo alt u chrank im bett
ou däm mit em blindehund
allne dene seit me chund
und vo chunde wott me gäl
nei was isch das für ne wält
und es wird privatisiert
das wo staatlech no räntiert
gäng meh, gäng meh, gäng meh gwinn
dasch vor chrämerlehr dr sinn
ungerere million
git es kei mänätscher-lohn
ds chlynschte heisst jetz gross: projekt
drin isch raffiniert versteckt
s'gseht wi bire sekte-n-us
wär mal drin isch chunnt nüm drus
drum löt lieber d häng vo däm
vo däm blöde-n-NPM
mir gö au kaputt am änd
mit new public mänätschmänt
Ruedi Krebs, 26. Mai 2001



CD erhältlich bei Ruedi Krebs: 031/352 71 68 oder ruedi.krebs@freesurf.ch
<http://www.berner-troubadours.ch>